

臺灣文獻類編

臺灣先賢詩文集彙刊

五〇九 醉草園詩集

五十六卷

【南投】張達修撰 林文龍編校

民國七十年（一九八一） 臺中刊本

下冊：三十七—五十六卷

呂興昌 審訂
黃哲永 主編

龍文出版社 印行

醉草園詩集／張達修撰

--臺北縣板橋市：龍文，2006〔民95〕
面；公分，--（臺灣文獻類編．臺灣先
賢詩文集彙刊．第五輯；11-12）

ISBN 957-2006-53-3(上册：精裝).—ISBN
957-2006-54-1(下冊：精裝)

851.486

95008764

臺灣先賢詩文集彙刊 第五輯

12 醉草園詩集(下)／張達修撰

審訂／呂興昌

主編／黃哲永

出版者／龍文出版社股份有限公司

發行人／周崑陽

地址／臺北縣板橋市中正路341巷32號一樓

電話／02-22728092

傳真／02-22721670

登記證／局版台業第4167號

出版日期／2006年5月

定價／新臺幣15,000元 精裝20冊

ISBN／957-2006-54-1

總經銷／年豐企業有限公司

地址／臺北縣深坑鄉北深路三段155巷19號10樓

電話／02-26641712

傳真／02-26621764

醉草園詩集
下

醉草園詩集

馬安壺



醉草園詩集卷卅七 辛丑

首春離彰赴中興新村有作

桃花源水卦山泉。容我棲遲十二年。高蹈待追蓮社侶。清談却羨竹林賢。蓬飛萍聚原無定。

穀食鶉居亦有緣。却喜故園歸路近。陽關漫唱渭城篇。崇樓傑閣自逶迤。虎踞龍蟠入畫宜。大地已迴新氣象。小儒重整舊生涯。平疇漠漠喧耕犢。隔岫交交聽曉鷄。桃李花穠人日近。裁箋先賦草堂詩。

村居漫興

近市何當受一塵。村居幸有好林泉。十年綺夢醒莊蝶。二月山城拜杜鵑。肉食早爲曹劌鄙。腸迴猶待朔臣憐。薜薇已熟靡蕪綠。坐看群峰雨後鮮。

萊園春霽

池楊樓桂雨餘嬌。躡屐偏勞折柬邀。十里夕佳亭外路。三分新綠上芭蕉。

清明上塚示諸弟

上塚欣携家。踏青循古例。行行歸篁山。春深風日麗。鳳麓九寮坑。開基已五世。先祖葬愚川。林邱長拱衛。緬維先考妣。東阡久藏閉。鞠育懷深恩。潛焉時隕涕。佳節邁清明。墳前虔致祭。宰木何飄蕭。鶻聲聞淒厲。願吟棣萼詩。努力光門第。耕讀教兒孫。親名揚勿替。

春日返醉草園偶成

廿載馳驅尙客途。故園二頃半荒蕪。幸憑瘠土添生計。新種青梅八百株。
山水清暉俗可蠲。修篁鬱鬱草芊芊。小鰯池畔臨風立。龍眼花開又一年。
領略登盤筍味香。歸耕有願幾時償。春光九十今過半。雛燕新鶯遶草堂。

上巳詣受天宮

十里南崗路。郊原氣鬱葱。却欣修禊日。同禮受天宮。縹緲仙居似。虔誠帝座通。危巔春雨霽。消受柏松風。

四月廿九日爲鄭成功三百年祭謁王祠有作

南國春葳蕤。櫟果紛初熟。歡聲沸七鯤。英雄懷大木。緬懷延平王。當年此登陸。鹿耳橫樓船。鯤溟飛箭鏃。一朝驅荷夷。千秋光漢族。受降圖眞形。英風猶在目。軍路開山川。遐荒綿正朔。屯田待揮戈。奈何天不祿。人世幾滄桑。巍巍尙祠屋。三紀逢嘉辰。中興虔禱祝。冠蓋羞馨香。宗親序昭穆。歌廣張煌言。詩吟沈太僕。臺員今桃源。收京銳早蓄。赤嵌登危樓。西望雲飛逐。願繼我王心。慷慨焚儒服。海宇清何時。擬煩詹尹卜。

慈母心

聖善爲懷輟笑顏。恩深如海厚如山。北堂詩與南陔詠。寫出丹忱照九寰。

陽曆五月廿八日題別龍山莊

讓水與廉泉。棲遲亦云久。愛茲龍山莊。十年居無咎。別離在今晨。留連未忍走。宵來謝

神恩。朝來辭鄰叟。脈脈鳥與魚。依依松與柳。親朋侵晨來。攀轅情彌厚。行李載一車。提挈及雞狗。蕭齋再盤桓。摩挲遍窓牖。天地本遽廬。蝸居豈我有。何當尋德鄰。百歲長相守。行行忍回頭。卦山儼揮手。

渭雄先生輓詩

中歲客彰城。交遊得陳實。先生人中豪。三好世少匹。先生耽音韻學醫嗜京劇。自號三好居士。早耽杜陵詩。又

擅嵇康術。興來歌伊梁。宮商協音律。大隱居巍樓。卦山挹崔嵬。結社樂耕門。高踪追六逸。琅琅小杏園。詩卷積成帙。攝養重平生。何來膺奇疾。半載臥匡床。凌雲竟絕筆。佳節近端陽。哲人痛云失。薤露感浮生。哀詠對斜日。

移居草屯

我來自磺溪。移居碧峯下。碧峰近新邨。花竹秀而雅。屋外多桑麻。門前稀車馬。薰風從南來。驟雨時震瓦。北窗夢羲皇。翛然忘炎夏。卅年寄萍踪。欣茲近粉社。但求此身安。何須謀廣廈。開軒面溪山。四圍如拱把。生事歸清恬。寒吟學東野。

生日書感

肉食緣疎酒廢斟。偷閑學易養虛心。千秋未定名山業。長夏寧棲惡木陰。忍對青燈搔短髮。飽嘗丹荔滌煩襟。北堂恩愛重迴憶。老大難忘陟屺吟。

醉草園夏日書感

箕踞蕉陰一嘯歌。草堂喜傍竹峰阿。閉門未許同司馬。種樹還思學橐駝。枝幹常青巖上柏。

污泥不染水中荷。十年凜守先人訓。慚愧空山長薜蘿。
新種青梅八百株。小園三徑未全蕪。蟬琴蛙鼓聲依舊。鶴澗鯽池景漸殊。玩世不恭懷處士。
匡時有論著潛夫。萬竿修竹搖清影。徙倚幽窓慮已無。

壽吳步初社長七十

麝詩剪燭聽鼃更。滾滾詞源峽水傾。逸氣直堪追鮑庾。大年端合配聃彭。鰲稱北海欽先覺。
社結南陔啟後生。一卷從心勤述作。杖朝重與頌昇平。

草屯曉起

烏秋鳴長空。疏鐘來遠寺。隱隱碧山巖。明月欲西墜。農人趁曉耕。叱犢喧田次。挑秧兼
分秧。繁勞心無二。十載勤晨興。意行閒掉臂。野水流潺湲。池蓮尙酣睡。東望九九峰。
凌雲影含翠。晞髮陽之阿。朝暾對妍媚。

江樓題壁

莽莽河山舉目殊。蘋風又起海東隅。迴槎已阻張騫路。濯筆重描鄭俠圖。水上魚龍方曼衍。
沙邊鷗鷺且相娛。津亭過客休譏笑。攬轡澄清屬我徒。

新秋

山城昨夜報新秋。海上颭風尙滯留。螢焰高低依腐草。蟲吟斷續起平疇。遲眠漸愛親燈火。
寡過還期泯怨尤。銀漢迢迢鐘磬遠。柴梳岩畔月如鉤。

翠梧抱外孫香熙歸寧有作

萍跡差欣寄草墩。郊居盡日掩柴門。晚來彌覺天倫樂。詩卷閒拋抱外孫。

白露日偶成

羈愁難遣慮難刪。吟興蕭然骨尙頑。節序無乖逢白露。棲遲有約負青山。郊居已任蓬蒿繞。野食方知稼穡艱。功業十年同水逝。坐聽簾外雨潺潺。蛙鳴秋水雁橫天。徙倚西風思悄然。橘柚香飄村舍外。荻蘆花孕澗溪邊。乾坤漸入爭雄歲。身世彌珍學易年。當戶分明峰九九。圖形待倩李龍眠。

陽曆九月十一日波密拉颱風來襲詩以紀之

客年水厄八月七。今歲風災九十一。海隅災患何其多。風雨頗疑今變質。山城節序近秋分。入夜天邊生紅雲。驀地忽聞風雨至。排山倒海如千軍。一夕狂飈聲怒吼。摧盡園瓜與池柳。寒窓燈炮夜淒淒。曉岫雲迷峰九九。黎明箕伯轉猖狂。沛宮餘韻增淒涼。翠竹萬竿蕉萬樹。縱橫滿地如垣墻。回南更感鳴條急。彷彿乾坤恣呼吸。鐵蹄蹂躪無東西。山農十戶九家泣。過境揚威十四時。忍教大地成瘡痍。天公肅殺知非意。戕象誰珍渾天儀。

晚菘

山厨領略菜根香。人去鳴騶喜獨嘗。遲我一畦供野饌。登盤好佐菊花觴。

過彰有懷涓雄

歌喉詩筆兩風流。更有醫名繼伯休。應社幾時同索句。卦山十載記從游。淒涼青鳥三秋約。寂寞元龍百尺樓。掛劍白沙坑外去。喬柯葉落響颼颼。

秋分偶成

蜚廉過後絕塵氛。秋滿山城橘柚芬。點水蜻蜓還作態。凌空鴻雁自成群。憑欄待賞瓊樓月。惜晷勤探玉笈文。涼意潛生詩思爽。西風九十已平分。

邱進益兄自日本歸葬鹿谷詩以悼之

蓬萊舉宅久淹留。化鶴匆匆歲已周。避地未酬江海志。招魂痛失阮嵇儔。遺徽卓越傳良史。俠骨峻嶒瘞故邱。斜日凍峰峰下路。白楊衰草颯殘秋。

梁雲光兄歸自日本賦似

十年采藥海天東。萬里南歸趁好風。歷劫共憐雙鬢白。洗塵喜對一燈紅。干戈未定吟梁父。哀樂無端感謝公。相約鳳凰山上去。清尊更醉菊花叢。

秋夜宿竹南

山色迷離海色蒼。征鞍暫駐竹南鄉。江魚入饌秋將晚。壁虎窺燈夜未央。滌慮差欣茶味永。遲眠陡覺簟紋涼。濤聲隱隱來中港。疑是扶搖起八荒。

梁雲光兄歸來過訪又言別

迢遙東海袖詩還。把臂林中渴慮刪。鴻爪重尋登鹿谷。螺杯空待醉龍山。花開萸菊寧回首。人駐蓬萊足展顏。明日鵬飛天際去。蒹葭長誦水雲間。

古愚重九尊魁有詩見示却寄

雄才又奪鳳凰池。青鳥殷勤報我知。漫感風塵長舛弛。相期朽腐化神奇。題餽却勝劉郎筆。

簪菊爭傳杜老詩。橘柚正香鱸膾美。何當謀醉稻江湄。

魯恂宗伯八秩晉八重宴鹿鳴詩以壽之

劫餘魯殿獨巍然。鼓瑟重賡鹿野篇。嶽降良辰觴菊酒。天留大老看桑田。蟾宮折桂縈前夢。鯤島傳薪啟後賢。壽世吾宗型典在。鸞洲新咏遍瀛壖。

立冬前二日爲吟淑誕辰詩以壽之

客歲君生辰。稱觴卦山麓。今年來碧山。所居近林谷。九月秋已深。菊黃天猶燠。設帨欣重逢。流光驚迅速。朝來謝神恩。康強爲君祝。女兒抱孫回。百里勞往復。野餐霧之峰。席地同鼓腹。唱隨逾卅年。江湖居未卜。吾生拙經營。多君賢且淑。大地滿哀鴻。群雄爭逐鹿。淡泊貴能安。慈祥自多福。願同鳳凰儔。雙飛又雙宿。婚嫁了何時。考槃在澗軸。

弔古戰場

漠漠沙場白骨堆。千秋猶見菊花開。龍爭虎鬪餘荒壘。黠武窮兵是禍胎。撥草費尋秦漢跡。招魂長惜項劉才。夜深燐冷蟲聲泣。彷彿前朝百鬼哀。

曉起感興

徙倚晨光裏。山城怯曉寒。陽阿晞短髮。合作楚臣看。

十二月二日夜偕謝條榮宿鳳凰村賦似主人

世事日紛拏。久矣辭幽谷。相約謝玄暉。名山同一宿。名山號鳳凰。村在山之麓。我來訪逋仙。早梅香繞屋。瓶笙淪烏龍。蓄畚收嘉穀。朝曦射窓櫺。孤雲橫嶂腹。巍巍大尖峰。

隱隱懸飛瀑。信美效溪山。居然畫可讀。懷哉楚狂人。鳳兮歌三復。何時招良儔。登高新耳目。振衣千仞崗。仙禽聽鳴竹。

冬夜謁南投聖廟

即藍田書院

嘆鳳傷麟百世師。藍田院裡仰威儀。經傳東魯尊當日。教闡南崗重此時。濂洛文章承舊業。梓潼山水入新詩。腐儒何幸膺天眷。禮罷神宮夜漏遲。

十二月廿四日煜公出殯未克趨奠乃於草屯懸像遥祭並悼以詩

綠橘生芻薦草墩。霜辰北望弔騷魂。溫公德望群流仰。賈誼文章百世尊。警效迴思眞面目。涕洟虔進古壘樽。西雲寺畔他時去。手擷寒英禮墓門。

寒流

浩蕩寒流撼海隅。鰻魚已現正頭烏。蕭蕭松柏風聲厲。漠漠葵菰雨點麤。歲晚荒村搗臘鼓。宵深老屋擁紅爐。故園梅蕊應齊放。待寫冰魂入畫圖。

虞美人草

碧血飛垓下。青青遍古原。迎風疑舞態。過雨儼啼痕。霸業隨煙散。寒枝帶露繁。楚歌今已寂。仙卉合銷魂。

冬日雜詠

塵海浮沉歲月深。每因苦筍動歸心。故園昨夜梅花發。誰和啁啾凍雀吟。郊居隨遇此心安。九九炎峰雨後看。乞得一畦新鼠壤。不栽菰葑種芝蘭。

養雞聊學祝雞翁。坐對談玄五夜中。明日寒流應過境。尋春先向柳橋東。

歲暮有懷雲光兄日本

歲云暮矣號朔風。窮冬不見南飛鴻。雪崖仙去邱遲渺。東溟惟憶今壺公。壺公採芝長日月。蓬萊駐久修仙骨。白頭富嶽對崢嶸。探幽興又尋梅發。携筇蠟屐山之阿。雪花飛舞詩情多。誅茅自結三間屋。感時漫詠五噫歌。却憐短鬢繁霜染。詩名偏爲醫名掩。舊遊回首星寥寥。新歲驚心春冉冉。柏松同葆後凋身。鷗鷺忘機久更親。何日刺船學巢父。沼津津畔尋幽人。

寒流去後偶成

社鼓霜鐘隔水喧。樓簾高捲納晴暄。駒光已逐寒流去。鴉背偏隨夕照翻。不用結鶉憐子夏。可能捫蝨學桓溫。南崗排闥青如畫。疑是倪迂落筆痕。

煙簑

霧縠雲羅擬未非。竭來那怕雨沾衣。半江殘雪閒披日。髣髴羊裘坐釣磯。

除夕

嚴寒已過雪霜天。餞歲烏溪碧嶺邊。心血浪拋憐賈島。頭顱依舊笑張顛。故山回首荒三徑。深巷藏身靳一廛。臘鼓聲殘聽漏盡。迎寅坐待得春先。

醉草園詩集卷卅八 壬寅

元日

旃檀香裡歲迎寅。爆竹聲喧起四鄰。天自蒼蒼偏隱約。峰連九九見嶙峋。謀生肯擲班超筆。歷劫翻珍沈約身。掄指痴兒歸不遠。團圓待醉草堂春。
是日黎明日食。故第三句及之。

元月六日劉炳鯤博士過訪賦似兼奉雲光

廿載歸來鬢未蒼。芳菲時節過南崗。嬉春夢得耽奇勝。濟世河間擅妙方。此去澄潭遊日月。何時濁酒話滄桑。談瀛共幽人約。滌垢重探熱海湯。

元月廿一日偕內人返醉草園有作

遊踪類飄蓬。久負歸耕約。行行指篁山。草堂近林壑。出岫雲無心。扶筇春有脚。桃李爭芬芳。我獨欣杜若。擊壤喧田疇。頗羨農家樂。桔槔灌我田。泉流免枯涸。驅犢懷當年。桑麻記約略。種樹多成圍。修篁亦解籜。每吟南山詩。陶潛同淡泊。偕隱歌何時。躬耕食藜藿。

元月廿二日喜雨

甘霖不用乞神靈。好雨知時響未停。簇簇新添秧影綠。絲絲初放柳條青。淋鈴疑和張徽曲。羨茗頻傾陸羽瓶。明日山鳩報晴霽。炎峰九九敞雲屏。

燕泥

封關何似築巢忙。風雨呢喃啄未遑。短喙春銜芹土潤。渾身日帶柳花香。一坵糊住鴛鴦瓦。五色黏來玳瑁梁。巷冷烏衣王謝渺。新居好定杜陵堂。

中興新村春日書事

虎龍峰勢對崔巍。如畫樓臺映日輝。夾道花濃桃李笑。沿郊雨過稻粱肥。西銘文字懷猶在。南社琴尊計已非。指點家山成咫尺。已無親養懶言歸。勞勞換得水衡錢。林表村居借一椽。亂世已艱謀食地。深山幸有讀書年。蓬飛我自憐高適。樗散人爭笑鄭虔。愁息平生愛修竹。數竿勤種短牆邊。

自草屯遷入中興新村寓齋有作

三遷得芳鄰。分明天錫福。生計鼠搬薑。行踪禽擇木。我來自碧山。新居近林壑。妻兒欣同携。入此三間屋。平生師杜陵。愁處必種竹。風雨今無虞。經書期補讀。壯哉龍虎山。迴環如起伏。朝夕幻煙雲。待收入圖軸。羈旅笑勞生。草堂貲未蓄。中隱定何時。擬求詹尹卜。

南都詞長以溪山煙雨樓詩集見貽賦謝

軼蕩英雄見性真。才華驚座語驚人。棗梨已定千秋業。輪轂曾經萬里塵。專壑荆公償素願。耽吟子美認前身。山樓百尺容吟嘯。日看煙容雨態新。

癡石宗兄輓辭